

En futur fan roboters nossa lavur

■ (rtr) **Roboters conquistan il mund da lavur. In studi ch'il Forum mundial d'economia FEM ha publictà fa ina prognosa plitost stgira.** Uschia vegnan ils proxims tschintg onns tschintg milliuns plazzas remplazzadas cun roboters. Sco il studi ch'il Forum mundial d'economia FEM mussà èn duas terzas da las plazzas che van a perder en las spartas biro ed administraziun e betg en las fabricas. La lavur en bleras fabricas è gia oz automatisada. Las maschinas surpiglia gia oz pliras lavurs da rutina. Il rapport mussa era che bleras plazzas vegnan stuschadas cun las consequenzas las pli negativas en il sectur da sanadad. Las grondas perdentas sajan las dunnas, perquai che las bleras plazzas sajan en segments cun in pitschen creschament u en secturs da distribuziun, biro e rollas administrativas, scriva il studi dal FEM. Betg periclitadas sajan plazzas en ils segments da la scienza natirala da la IT, ma gist en questas

professiuns saja la quota da dunnas plitost bassa. Ils roboters vegnan a stgaffir dapli effizienz e dapli productivitat, ha ditg il schef da l'interpresa svizra ABB *Ulrich Spiesshofer*. Pessimissem na saja dentant betg el dretg lieu. La tema avant roboters saja veglia, ma nungiustifitgada, ha ditg Spiesshofer. Sche nus restain innovativs, alura pudain nus mantegnair las plazzas da lavur. Tenor l'associaziun d'industria Swissmem è la Svizra pinada bain sin ils svilups tecnologicis dal futur. Gist quest svilup avria interessantas perspectives, uschia possia la productivitat vegnir auzada, innovativs products vegnir creads sco er novs models da fatschenta, scriva Swissmem en ina communicaziun a las medias. Il studi ch'è vegni fatg per il FEM 2016 sa basa sin enquistas tar top-managers dals 350 pli gronds concerns dal mund. Al FEM han producents da roboters era già plattafurma per preschentar lur roboters e lur funcziun.